

REGIONAL NEWS BULLETIN

HEADLINES (EVENING)

Date – 11/04/2025

Time - 18:30 -18:40Hrs

- Rajya Sabha MP Pu K. Vanlalvena'n an ram luahchin tlansana Mizorama raltlan thalaite chu mahni ram chhanhim tura haw turin a chah.
- Larsap, General (Retd) Vijay Kumar Singh-an zirna in leh sawrkar thuneitute chu homoeopathy chawilar kawnga hma la zel turin a chah
- Prime Minister Narendra Modia chuan vawiin khan Varanasi-a Mehdiganj ah cheng vaibelchhe sang 3 leh 884 hu project 44 a hawng
- President Droupadi Murmu chuan hlawhtling taka Slovakia a tlawh hnuah vawiin khan India panin a lo haw.

<><><>

RS MP

Rajya Sabha MP Pu K. Vanlalvena'n an ram luahchin tlansana Mizorama raltlan thalaite chu mahni ram chhanhim tura haw turin a chah.

He thu hi vawiina Mizo Hnam Run chhung inkhawmah sawiin Pu K. Vanlalvena chuan Chin state, Mizoram let thum vela lianah mipui nuai nga vel bak an awm tawh lo, an tlan darh nasa a. Aizawl, Lunglei leh Champhai khawpuiah Chin nula tlangval an tam lutuk. Ral do turin an haw a ngai a ti a, Chin state khi an ram an ti a nih chuan Burma sipai do turin haw se, tanpui an ngaihna apiangah an tanpui ang a ti.

Manipur Zohnahthlak te pawh an ram tia an chhal chinte humhalh zel an duh chuan an raltlanna ata kir se, ram chhan turin haw a ngai, a ti.

Pu Vanlalvena chuan, kum 2021-a Myanmar tualchhung buaina avanga rawn tlan thla chu sawrkarin rei tak a chawm hnuah an tih chhunzawm theih reng loh avangin hmun hrang hrangah raltlan an awm darh nasa a ti a, Chin State Mizoram let thum vel laia lian

ah mipui nuai 5 vel bak an awm tawhlo ti a ti a, Manipura zohnahthlak te pawh chi leh chi indona sim a pawimawh a ti a, Mizoram hmun hrang hrangah Manipur raltlan thalaite awm ngawt lovin an hmelma do turin an haw a ngai a ni a ti.

Pu Vanlalvena chuan MNF Party chu Mizoram leh hnam tana kal na ngam ber a ni a ti a, Assam nena ramri buai chungchangah pawh huai takin Mizoram tan an kal thin tih sawiin ram leh hnam tana hma la nasa ber an ni a ti.

Rajya Sabha MP chuan tunhnaia Mizoram assembly budget session-a Chief Minister Pu Lalduhoma'n Uniform Civil Code chungchang a sawi chu thu belhchian dawlo a ni a ti a, UCC chu an sawrkar laia do nasa ber an ni tih sawiin UCC bill chu parliament ah put luh ala ni ngai lo a, vote lak ala nilo tih sawiin MNF sawrkar lain UCC duh lamah vote an pe a tih chu thudiklo ani tih a sawi bawk.

<><><>

DINTHAR PROTEST

Aizawl Dinthar veng Local Council kaihhruaina in Dinthar pawl hrang hrangin vawiin chawhma dar 11 leh a chanve vel khan an veng chhungah Heroin hawng 440 manna a inhnamhnawiha puh Henry Lalbiakzinga Chhundeng laka lungawi loh lantir na'n kawng an zawh.

No 4 hawng 440 man chungchanga Dinthar Mipui lungawi lohna Kawngzawh hi Dinthar kawn atanga tan a ni a, Dinthar Local Council Vice Chairman Pu R. Lalawmpuia'n kaihhruaiin, mipui pungkawm te chu “Dinthar khawtlang hian ruihhlo kan do zel dawn” tih leh “Thalaite nunna suattu ruihhlo kan do zel dawn” ti te in an au rual a.

Dinthar kawn atangin Heroin hawng 440 mannaa inhnamhnawiha puh, Henry Lalbiakzinga Chhundeng te inkawt thleng kawng an zawh a, an inkawtah hian Dinthar Local Council member Pu Lalnuntluanga chuan DINTHAR KHAWTLANG MIPUI RESOLUTION a chhiar chhuak a, khawtlang mipuiten resolution hi an pawmpui tih lantir nan an ban ding lam pharin an au rual a ni.

Lungawi loh kawng zawh chhung hian Dinthar veng chhunga two wheeler taxi leh taxi pangngai bakah eichawp dawr, sa leh

chawhmeh zuar zawng zawng te chu khawtlang hruaituten an ngen angin an khar vek a ni.

Hetihlai hian, Dinthar khawtlang lungawi loh lantirna chu Heroin hawng 440 chungchang bik ni lova, ruihhlo do kawngzawh ni zawk maha an hriat avangin Aizawl Dinthar veng thalaite chuan an thlawp lo a, Akashvani zawhna chhangin, Dinthar thalai thenkhatte chuan khawtlang lungawi loh lantirna chu Heroin hawng 440 chungchang bik ni lovin, khawtlang hruaitute hmalakna chu boruak vuak daih tumna leka ruihhlo do kawngzawh ang an tih thu an sawi a ni.

Zawhna chhangtu dang pakhat leh chuan thla hluia March ni 14-a Heroin hawng 440 manna a inhnamhnawiha puh Henry Lalbiakzinga Chhundeng chungchangah hian an khawtlang hruaituten tlai khaw hnua kawngzawh an huaihawt chauh hi mualpho an hlauh leh hnahnawh vang ni-a an hriat avangin thalaite chuan vawiin kawngzawh hi an thlawp lo ni a hriat thu a sawi bawk a ni.

Nizan dar 10 vel atang khan Dinthar veng thalai thinurte chu Henry Lalbiakzinga Chhundeng chenna inkawtah pungkawmin, inneitute pangpar pot hmangin an lirthei paruk- Bike pahnih, Honda cb 650 leh Honda CB300R, Scooter pakhat Suzuki Avenis an vawm chhia a, Car pahnih- Maruti Suzuki Ignis, leh Mahindra XUV 700 chu a darthlalang leh a bang te an vawm chhe bawk a, hemi chungchang hria veng dang thalai engemawzat an tel bawk ni a thu dawn a ni a, thalai pungkawmte hi zan dar 12 velah an tin darh tan a ni. Tukin zing dar 3 vel khan Pu Henry-a chenpui mi 7 te chuan an chenna in hi a chhuahsan a, tun dinhmunah an inah hian tumah an awm rih lo a ni.

<><><>

GOVERNOR

Larsap, General (Retd) Vijay Kumar Singh-an zirna in leh sawrkar thuneitute chu homoeopathy chawilar kawnga hma la zel turin a chah.

Vawiin khan World Homoeopathy Day 2025 lawmna, Directorate of AYUSH, buatsaihin Aizawl Dawrpui Multipurpose Centre ah neih a ni a, he hunah hian thusawiin Larsap chuan Mizote chu tunhma atanga damdawi chungchang thui tak hria an nih thu leh homoeopathy chu Mizorama thang zel thei a ni tih sawiin, zirna

in leh sawrkar thuneitute chu homoeopathy chawilar kawnga hma la zel turin a chah a. Homoeopathy Doctor leh zirlaite chu research lama tan la turte, zirchianna behchhana Homoeopathy tihhmasawn tum turin a chah bawk.

He hunah hian Health & Family Welfare Minister Pi Lalrinpuii pawhin thu sawiin, Mizoramah AYUSH Doctor tlemte awm mahse, an hnathawh fakawm a tih thu a sawi a. National Health Programme hrang hrang kenkawhnaah AYUSH Doctor-te chu Health Department kutke pawimawh leh tangkai ber ber an ni chu lawmawm a tih thu sawiin, indaihlohna leh mamawhte pawh Sawrkarin a tul angin a buaipui zel dawn a ti.

Tun dinhmunah hian Homoeopathy Doctor zirchhuak hi Mizoramah 280 vel an awm a, heng zinga mi 7 te hian Homoeopathy Post Graduate Degree an nei a ni.

<><><>

CM

Chief Minister Pu Lalduhoma leh UD & PA Minister Pu K. Sapdanga ten tukin khan Aizawl Ven Buk (Integrated Command & Control Centre under Smart City), Treasury Square a mi an tlawh.

Chief Minister chuan, Aizawl hmunhmma lun zual lai tuam vek thei CCTV network, record fiah leh changkang tak a awm chu lawmawm atih thu sawiin enkawlina lam hautak deuh mah se ram leh khawtlang venhimna kawngah a tangkai dawn tih sawiin chhiatna thlen palh theihna hmunah a tangkai zual dawn tih a sawi.

UD&PA Minister Pu K. Sapdanga chuan Control Room chu an hmang tangkai hle tih sawiin misual, rukru leh dawt sawi ching thlengin an chhui chhuak thin a ti a, thil thleng dik tak a hmuh theih avangin hnuchhui kawngah a tangkai takzet tih a sawi.

Aizawl Smart City CEO Pu CC Lalchuangkima chuan an hnathawh dan tlangpui sawiin Aizawl khawpui hmun thlan bik 76 ah CCTV 237 leh Pan Tilt Zoom 39 dah a ni a ti a. An dahna hmun zawng zawng mipui hnenah an hrilh vek lo tih sawiin Hmun pawimawh lai chu an hmu thei deuh vek tawh a ti a, Hmun thenkhatah chuan hmel hre hranga chhinchhiah thei (Facial Recognition) Camera dah an ni tih sawiin Lirthei pawh an vah velna thlengin an hre thei a, an Automatic Number Plate

Recognition system hmangin lirthei bo case 600 vel lai an ching fel tawh tih sawiin Lirthei, traffic dan bawhchhia pawh an chhui zel thei tih a sawi.

Aizawl Ven Buk (ICCC) hi April ni 1, 2023 khan Union Home Minister Amit Shah, chuan a hawng a, cheng vbch 87.18 senga din niin A enkawl nan thlatin sum cheng nuai 7 sing 8 vel mamawh a ni a, Mipui, a hmang tangkai duh tan cheng 100 chawia hman theih a ni.

Chief Minister-in Aizawl Ven Buk a tlawhnaah hian sawrkara mi pawimawh ten an tawiawm a ni.



NATIONAL TRIBAL YOUTH FESTIVAL

Ministry of Tribal Affairs leh Directorate of Social Welfare, Women & Child Development Department hmalaknaa buatsaih National Tribal Youth Festival ni 4 awh chu vawiin khan State Tribal Resource Centre, Kelsih-ah khar a ni.

National Tribal Youth Festival hi Chief Secretary Pu Khilli Ram Meena chuan April ni 8 khan a hawng a, he festival chhung hian thenawm state atangin zai leh lam thiam tam tak an lokal a, Mizoram State Commission for Protection of Child Rights Chairperson chuan Pu Jimmy Laltlanmawia Mizo hnam ziarang chawisan kawngah mipuiten tan lak thar a pawimawh tih sawiin hnam nunphung leh chetzia hman atanga lo vawn nun tawh te thar thawh a pawimawh tih a sawi.

He festival chhung hian rimawi leh hnam lam chi hrang hrang bakah Food Court, exhibition te nen hun hlimawm tak hman theih tura buatsaih a ni a, he hunah hian Nagaland atangin Imnainla Jamir, Manipur atangin Vawunchawi Vaiphei leh zaithiam hrang hrang an inlan a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



PM

Prime Minister Narendra Modia chuan vawiin khan Varanasi-a Mehdiganj ah cheng vaibelchhe sang 3 leh 884 hu project 44 a hawng. Heng project zingah hian kawngpui tha siamnate, kawlphehtha, zirna leh tourism lamte an tel a ni. Vantlang inkhawm buatsaihah Prime Minister Modia chuan thusawiin Mehdiganj khawpui hmasawn chak avanga lawmawm atih thu sawiin Kashi hmun chu hmunhlui hmingthang chauh ni tawh lovin entawn tur hmasawanna thlentu a ni tawh a ti a. Hamsawanna ruhrel thang chho zelte, sakhaw thila zinte hiptu awm chho zel leh mipui nitin mamawhte tihhmasawn zel a ni chuan hmanlai khaw hmun hlui kha tunlai khawpui changkang takah a chhuah tawh a ni a ti.

Vawiin inkhawmah hian Uttar Pradesh Governor Anandiben Pate, Chief Minister Yogi Adityanath leh Deputy Chief Minister te pawh an tel a ni.



J&K

Jammu and Kashmir-ah sipaiten firfiak 1 an kaphlum. Kishtwar district-a sipai leh police te tangrualin firfiak dapchhuah beihpui an thlaknaah firfiak pakhat kahhlum a ni a. Tunah hian sipaite leh firfiakte hi an la inkap chhunzawm zel nia thudawn a ni. Firfiakte nen tum thum an inkah hnuah Police leh security force te chuan helai chhehvel ah hian firfiakte chetvelna an lo chhui tawh a. Kathua district-a Sanyal area ah March ni 24 atang khan beihpui an thlak tan a ni.



PRESIDENT

President Droupadi Murmu chuan hlawhtling taka Slovakia a tlawh hnuah vawiin khan India panin a lo haw. President zingah kum 30 hnua Slovakia tlawh leh hmasa ber a ni a. A cham chhungin Slovakia President Peter Pellegrini leh Prime Minister Robert Fico te a kawm a. Inremna thuthlung pahnih an ziaak a ni. President hian Slovak-India business forum ah thu a sawi bawk a ni. Slovakia President chuan UN Security Council-a Permanent member-a India a awm theih nan an thlawp thu a sawi avangin President Murmu chuan Slovakia chungah lawmthu a sawi a. Tun tuma a zin chuan sumdawnna leh hmasawanna hrang hrangah kawng a hawnbelh a beisei thu a sawi bawk a ni.

